

Peui a l'an mandà a l'ostaria
 Pr fè portè un bocal d' vin,
 E la festa l'è sta finia
 Dop aveje cimpà bin.
 E la festa, ecc.

**Matrimonio delle figlie di Lucrezia
 Gelofrada.**

CANZONE XVI.

Scotè, se pur v'agrada
 Sta bela novità:
 Le fie d' Gelofrada
 Son tute arcapità.
 Sotrà ch' l'è stà la mare
 S'è manegià 'l pastis,
 Tra amis e tra compare
 Pr deje dunna ardris.
 Da peui che poch pr vota
 S'è spatarà la vos
 D' coula bonna dota,
 E coul fardel famos;
 Sentì, com' a marciava
 La fior dla gioventù,
 E ognun a procurava
 A feje servitù.
 Vedend loli, a l'an butà
 Su j' arie del folat,
 E tute tre a son restà
 Seriose come d' pat;
 A penna a salutavo
 Dla testa o con la man,
 Ma nen s'ancomodavo
 D' aussè coul fabrian.

La gioventù pi fola
 Ch'a n'era carpionà,
 Perdia la parola
 Restand bel e stonà,
 Ma tuti coui ch'a l'ero
 Nen tut afait massuch,
 Pian pian a sla sbignero
 Piantandie astà s'un such.

Così j'è sta la piassa
 Ai tre parti pi bon,
 Gian Groula e Giors Tignassa,
 E Brtromè Plandron;
 J'è 'l prim ch'a fa 'l ressiare,
 E l'autr a fa 'l magnin,
 Ma 'l ters a l'è pa d'vaire
 Ch'a fa 'l marcand d'sufrin.

Anlora ste smorfionne
 Posand coul bel umor
 Andasio pi a le bonne
 Con cousti tre sfojor,
 Con tute soe richesse
 L'an cambià d'sentiment,
 Fasandie sent caresse,
 E mila compliment.

Peui senza fè d'mastiore
 A s'è accordà l'afè,
 Venend a prometiure
 Lì subit su doi pè;
 Fasandie alla presensa
 D' doe testassion,
 Ch'a son Simon Scorensa
 E Giaco Scarniflon.

Gian Groula veul Ciaflassa
 Prchè ch'ai smia ampoch,
 E Giors la Patoflassa
 Prchè son giust doi gnoch;

La bela Gianaflassa
 Conven a so Plandron,
 Almanch a s' ambrassa
 La losna con 'l tron.

Pr tuta sicuressa

S' son tocà la man,
 E dassé pr promessa
 Un bel quattrin d' Milan;
 E peui a son basasse
 Ma con un' afession,
 Ch' antorn a le ganasse
 A j'è restà i nisson.

E pr finì le facende,
 È ste lontan dai guai,
 L'an fait ampò destende
 I seu istrument dotai;
 Con mesa parpajola
 A l'an pagà 'l nodar,
 Ch' a l'è Bernard Famiola,
 Coul ch' a vend i pom badar.

A l'an spedi Brighela
 Ch' andeis a dè l'avis
 Apres dla parentela,
 A tuti i bon amis;
 Ch' a son tuta sgnoria,
 E fior dla nobiltà
 Da sapa, piola e stria,
 Da brustia e cis va là.

Gnun veul pa figuresse
 La confusion dla gent,
 Ch' andava a ralegresse
 Con coui mostas rusnent!
 E pcit e grand marciavo
 Durand poch manch d' un meis,
 E li s' sbergnacavo
 Pr vede coui arneis.

Tuti i marcand andavo,
 I ghingajè e sartor,
 Prchè ch' a s' figuravo
 D' fè un guadagn da sgnor,
 Vedendie peui furnie
 D' tanta provision,
 A l' an pià soe gnie,
 E mnà 'l petandon.

Scotè sta sì ch' l' è bela,
 E degna d' atenssion,
 A tniine pa capela
 Ficà là ant un grupion!
 E 'l frel su l' us dla stala
 Podia pa tranfiè,
 Con la cabassa an spala
 A fè 'l sirimoniè.

Tra tant ij spos, pr fesse
 Stimè da diligent,
 Andasio ampò a preparesse
 Ognun so apartament,
 Ch' a smiavo tre ratere
 Forgià tute pr stort,
 Sens' us e senza vrere,
 Pr là s' un solè mort.

A l' an pià una sivera
 Pr core e andè cariè
 Ognun tut lo ch' a j' era
 Spetant a soa mojè;
 An doi o tre cariagi
 L' an tramudà pr fait
 I mobil e i bagagi,
 Ai na fuslo pura stait.

E peui a son prontasse
 So past tra mairi e gras,
 Con d' ranne con d' lumasse,
 Ansem a tre crovas;

Una piatlà d' servlette,
 Un ciouch rusti ant 'l forn,
 Con ses o set siolette
 Pr guernitura antorn.

Una mnestra d' fava
 Già tuta morinà;
 Un bon buji d' crava
 Con d' rave carpionà,
 Tre pich a la cialota,
 La fricassà d' un foin,
 Una stofà d' marmota,
 Con un ragou d' luvìn.

A l' an cuji una minna
 E quater cop d' agian,
 Pr fè tanta farina
 Da fè una cheuita d' pan;
 A l' an empi d' sebrette
 D' lambrosca con d' brignette,
 Prestaje dai vsin
 Da fè una brinda d' vin.

A penna son furnisse
 Tuti i sirimoniai,
 Ch' le spouse son unisse
 A preparè i mofai,
 E dle livree scure
 D' un ormesin armis
 Trovà ant le ramassure
 Pr dè ai parent e amis.

A l' an guarni d' sarsiure
 Tre fassolat rancian,
 D' teila d' armnure
 Pr dèje al sgnor Piovan;
 Tra tant ij spos a l' an comprà
 So bel anel a pr' un,
 Ch' i cherdo ch' a j' è coustà
 Pa manch d' un doi-dnè l' un.

Furnie le facende

E congregà i parent,
 A son nen stait a spende
 So temp inutilment,
 Ma piandse ala brassëta
 Ste tiorbe e sti gosè,
 A l'an pià la sbruëta
 Pr core andè a sposè.

A vede sti mariagi

Ai n'è surti dla gent,
 Tre quart d' coul vilagi
 L'è cors a tni da ment;
 Giamai a s' son sentie
 Dle ciabre d' coula sort,
 Sicur ch' ventava rie
 S' un fussa stait mes mort.

Che quantità d' ressiura

S' è vista spatarà,
 E d' bran fora d' misura
 Pr tute le contrà!
 Oh! quanti son levasse
 Su l' andoman brovà,
 Quand a s' son trovasse
 Su l' us la soa porà.

Su cousti matrimoni

(Parland li tut ariond),
 A j'è da fè un bel Toni,
 Dii pi grassios del mond;
 Sigura ch' un podria
 Empi un quintern d' papè
 Pr cousta drolaria,
 E peui fela stampè.